

## Tèxte 2 - Arrevirada Calams 2016

L'endoman de la rentrada Quentin e Maria que s'arretròban dens la cor de recreacion deu licèu Pèir de Garròs, coneishut tau son labèlle "Patrimòni europèu".

Imatge generau : dens la cors de recreacion los dus protagonistas que s'encontran.

Quentin : Tè, quin te va Maria ? Ditz-me, tot que's passa plan ?

Maria : Bò, que poderé anar miéllher. Figura't que sorteishi deu cors d'istòria e lo professor ne'm dòga pas !

Quentin : Que debes aver Sénher Jacob ! Que l'avoï l'an passat, que sèi quin ei. Tà'u trufar, que l'aperàvam sénher Jacobin !

Maria : Qu'a ronhat a perpaus de l'opcion patrimòni causit per la gàbia. Que's pensa que ne serveish pas tà gran causa d'estudiar çò qui nòma dab desdenh "l'istòria deu parçan".

Quentin : Ne te'n dèssis, l'an passat qu'èra la medisha causa. Mes dab quauques ancians de calandreta que'u hasom cap.

Maria : E alavetz ? Que'n tirètz quauquarren ?

Quentin : Que'u perpausèm de convidar la directora de l'ofici de torisme qui ei apassionada per l'istòria de Gasconha. Qu'ac hasó e qu'estó enlobatat.

Maria : Vist çò qui ns'a dit, los sons amors que son devuts estar quauque còp contrariats.

Quentin : Exacte. Mes mercés ad aquesta damiseleta, que tribalhèm sus Gaston Fébus e beneficièm de quauquas sortidas sus las peadas d'aqueste gran princi.

Maria : Tot qu'ei a tornar har. Bissè que serà sensibla a la destinada de la bèra Alienòr d'Aquitània.

Quentin : Perqué pas ? Mes que'vs caleré cercar ua auta intervienenta de l'ofici de Torisme.

Maria : Qu'ac sèi ! Que caleré que tribalhèssim dab la bibliotèca municipau. Que's tròba que coneishi mantuas documentalistas qui son a l'encòp charmantas e competentas.